

全華叢書





詩集傳名物鈔卷第五

元許謙撰 郡後學胡鳳丹月樵校梓

小雅二

傳○鄭氏詩譜小雅十六篇爲正雅六月之後謂

之變雅○釋文從鹿鳴至菁菁者莪凡二十二

篇皆正小雅六篇亡今唯十六篇○語錄問二

雅所以分曰小雅所繫者小大雅所繫者大叻

叻鹿鳴其義小文王在上於昭于天其義大問

變雅曰亦只是變用他腔調○又曰大雅氣象

宏闊小雅所陳各止一事○又問詩亡然後春秋作先儒謂東遷之後黍離降爲國風而雅亡恐是孔子刪詩時降之曰亦是他當時如此當初在豐鎬時其詩爲二南後來在洛邑時其詩爲黍離只是自二南進而爲二雅自二雅退而爲王風○又曰雅蓋是王公大人好生地做都是識道理人言語故他裏面說得儘有道理好子細看非如國風或出於婦人小夫之口但可觀其大槩○別彼列反朝音潮釐音僖說音悅



齊側皆反

鹿鳴

正小一燕享賓客

經

鹿見野之有苹而呦呦和聲呼其羣以共食  
以興君有酒食召集嘉賓而共饗也燕享之  
意全在此興中故下文祇見作樂奉幣耳人  
之好我示我周行冀之之辭也二章承上章  
而言德音者有德之言卽示我之周行也既  
足以示民使不偷薄則君子所當取則而倣

傲之君子凡有位者也○德音邶谷風訓爲  
美譽豳狼跋云猶令聞此德音孔昭是言其  
平日德音素甚明也故足以示民使不偷薄  
而君子當則傲矣如此則與上章意不相蒙  
上章則求以言語示周行此章則欲以德行  
威儀示法則愚恐二說皆通讀者擇之  
詩記燕禮有親疏之義有尊卑之別有長少之  
序有內外之分有賓主之位人倫之道莫有不  
備而我有嘉賓踐其禮安其樂誠信感於人心

故聞者見者靡不孚而化之不曰德音孔昭示  
民不忮乎觀其禮而知則且儆者不亦君子乎  
別必列反長知丈反少式召反

此又與前二說不同記于此以備慎思蓋傳  
意以嘉賓平日美譽足以示人詩記以燕禮  
足以示人愚則說以旅語之善言足以示人  
各有攸當

又曰式燕以敖言其禮之從容也夫莊而不至  
於矜和而不至於流此其德之純也

傳○一章爾雅藟蕭注今名藟蒿疏葉青白色莖似箸而輕脆始生香可生食又可蒸食詩緝萃有二種爾雅萃萍其大者蘋水生之萃也又云萃藟蕭陸生之萃卽鹿所食是也藟音賴脆七歲反○使去聲○瑟見周南關雎○樂書萬物成乎良則始作而施生故其音匏中而爲笙古者造笙以曲沃之匏汶陽之篠列管匏中而施簧管端有長短之制法象鳳凰其形鳳翼其聲鳳鳴其長四尺大者十九簧謂之巢以眾管在



匏有鳳巢之象小者十三管謂之和以大者倍則小者和也○簧見王君子陽陽傳○筦飲之而有幣酬幣也食之而有幣侑幣也疏公食大夫禮賓三飯之後公受宰夫束帛以侑注云束帛十端帛也侑猶勸也主國君以食賓殷勤之意未至復發幣以勸之欲用深安賓也是禮食用幣之意饗禮亡而聘禮注云致享以酬幣故知飲之而有幣謂酬幣也而所用幣無正文不過束帛乘馬而已此諸侯酬大夫禮也其天子

酬諸侯及諸侯自相酬不必用束帛乘馬聘禮

注又曰琥璜爵蓋天子酬諸侯也謂以琥璜將

幣以送爵琥以繡璜以黼此則饗之酬幣天子

食之侑幣無文飲食乘並去聲○疏鄉射記古

者於旅也語注云禮成樂備乃可以言語先王

禮樂之道是飲酒至旅酬之禮而語先王之道

也○分扶問反○緇衣私惠不歸德君子不自

留焉詩云人之好我示我周行注疏私惠謂不

以公禮相慶賀時以小物相問遺也言人以私

小恩惠相問遺不歸依道德如此者君子之人  
不用留意於此等之人不受其惠也故文王燕  
羣臣惟欲以正道示我不以褻瀆邪僻之物相  
遺也○二章敲去刃反疏荆楚之間謂蒿爲敲  
○疏以目視物以物示人古同作視字後世視  
物示人之字異由是經傳中二字多相雜亂○  
三章疏苓生澤中下地鹹處牛馬亦喜食之○  
題下學記大學始教宵雅肄三官其始也注宵  
之言小也肄習也習小雅之三謂鹿鳴四牡皇

皇者華也此皆君臣宴樂相勞苦之詩爲始學者習之所以勸之以官且取上下相和厚語錄入學之始須教他便知有君臣之義始得肄羊至反○本爲之爲于僞反食之之食音嗣樂之樂而之樂音洛夫音扶

四牡正小二勞使臣

經○三章榭見唐鵝羽

章各五句一章二章五章賦也自爲一體上二句爲一節下三句爲一節第二句第五句



用韻其命辭用意皆同三章四章興也亦自  
爲一體上三句爲一節下二句爲一節第二  
句第三句五句用韻命辭用意亦同一篇之  
中賦興既異體其文又自各爲一體也

詩記父至尊也母至親也知母之親則知父之  
尊矣知父之尊則知君之重矣卒章及母而不  
及父本其恩所起以教愛也愛母則敬父矣敬  
父則尊君矣未有愛親而不愛其君者也○子  
金子卒章獨言將母者父丈夫也猶能自養婦

人非子不能自養此尤人之情也

傳○一章詩記說文煮海爲鹽煮池爲鹽故安邑  
之出爲鹽鹽苦而易敗故傳以不堅訓之○此  
勞臣之勞郎到反勞使出使之使去聲分去聲  
情思之思去聲○二章嘽嘽毛氏喘息之貌馬  
勞則喘息李氏今之駱馬最耐勞苦以耐勞苦  
之馬今則喘息則其勞可知矣○李氏不遑啓  
處大意爲不暇居處之義○三章傳雝當作佳  
爾雅作佳其夫不夫方于反不方浮反又如字

爾雅作鳩鴝音同詩緝一鳥十四名雛也佳其  
也鴝鳩也祝鳩也鳩鳩也鶉鳩也鷓鴣也楚鳩  
也鴝鳩也荆鳩也乳鳩也鶉鳩也鴝鳩也鷓鴣  
也鴝音浮鷓音昆鶉音皇鴝音汾鶉音羽鴝音  
役鷓音葵○養釋文以上反○四章枸櫞音苟  
記詩緝卽枸櫞本草又名仙人杖西王母杖其  
根名地骨其莖榦三五尺作叢春作羹茹微苦  
○卒章使去聲勞去聲○題下魯語叔孫穆子  
名聘於晉晉悼公饗之樂及鹿鳴之三而拜樂

三曰君之所以況使臣臣敢不拜四牡君之所  
以章使臣之勤也敢不拜章左氏傳在襄四年

○勞使皆去聲本為之為去聲

皇皇者華小三遣使臣

經○左氏傳襄四年穆叔即叔孫豹曰皇皇者華君教

使臣曰必諮於周臣聞之訪問於善為咨咨親

為詢咨禮為度咨事為諏咨難為謀魯語皇皇

者華君教使臣曰每懷靡及諏謀度詢必咨於

周臣聞之咨才為諏咨事為謀咨義為度咨親



爲詢忠信爲周二傳注皆謂咨之於忠信之人  
解頤新語咨者訪其事也諏有聚議之意謀有  
計畫之意度有體量之意詢有究問之意○二  
章駒見陳株林傳○三章騏見秦小戎○四章  
駱見四牡傳

傳○一章之使如字餘皆去聲下同○三章忍釋  
文音刃李氏如絲調直也○五章爾雅注疏陰  
淺黑色毛淺黑而白兼雜毛者名駟今謂之泥  
驄○題下本爲之爲去聲夫音扶

常棣小四正四燕兄弟 周公

經○三章詩記此章言兄弟相須之意急猶脊令

首尾相應急難之際其相應如是也詩緝脊令

行則搖在原是其行時也行而在原則搖其身

首尾相應如兄弟急難相救也

一章毛以為常棣之華鄂然外發之時豈不

韡韡而光明鄭以為常棣之華其鄂拊韡韡

然光明疏以為毛以眾華俱發而光明興兄

弟眾多而和睦鄭以華喻兄鄂喻弟相覆而

言光明猶相順而榮顯愚案毛以鞞鞞者在華  
鄭以鞞鞞者在鄂味經詞氣毛說爲長以華  
鄂分比兄弟雖似差勝然但作無義興不必  
如疏家所言毛意亦可也拊與跗同○後三  
章謂雖有陳列籩豆之盛而飲酒醉飽必兄  
弟具在然後能和樂相慕謂與人燕樂必得  
兄弟而後和雖妻子好合如琴瑟必兄弟皆  
翕合然後和樂可久豈惟他人至於妻子之  
親苟不好愛於兄弟則亦不能久也欲宜室

家樂妻孥非厚於兄弟皆不可也試究之圖  
之其信然乎蓋人於同氣不能厚是猶薄於  
親也人而不知厚其親而乃厚於妻子及他  
人是所謂不知本此心違於理者遠矣違於  
理者遠則其感召亦有悖於理者及於身矣  
雖妻子其能保乎

傳○一章爾雅唐棣移常棣棣李氏何彼穠矣唐  
棣之華與論語所舉則所謂移此常棣與采薇  
言維常之華則所謂棣詩記今玉李也華鄂相



承甚力○二章惡烏故反關烏還反射音石盾  
食準反○東漢郡國志河南尹中牟有管城故  
管叔邑河內郡山陽有蔡城蔡叔邑通典管城  
縣屬鄭州與中牟縣鄰山陽卽懷州脩武縣尙  
書孔傳蔡叔所封圻內之蔡仲之所封淮汝之  
間圻內之蔡已滅故取其名以名新國今案郡  
國志所言卽圻內之蔡也○三章疏脊令雀屬  
大如鸚雀長腳長尾尖喙背上青灰色腹下白  
頸下黑如連錢故杜陽人謂之連錢詩緝雪姑

也○爲去聲分扶問反孫音遜難去聲五章同

○四章務釋文如字讀者又音侮此從左傳及

外傳文傳亦曰春秋傳作侮罔甫反愚案此字

陸氏朱子皆作去上二音讀○狠胡懇反○六

章屢於豔反○卒章帑釋文依字吐蕩反經典

通爲妻帑字○題下幾音機復扶又反

伐木小五燕朋友故舊

經○語錄伐木大意皆自言待朋友不可不加厚

之意所以感發之也○一章詩記興之兼賦比

者也○詩記詩人多有相因之辭如伐木而感  
鳥鳴蓋因此以興焉者也故下章皆以伐木言  
之○友聲謂應聲○語錄若能盡其道於朋友  
雖鬼神亦必聽之相之而錫之以和平之福○  
三章乾古寒反○詩緝此言無酒設言之耳一  
詩之內凡言我皆燕朋友者自我也

傳○一章好呼報反○二章淮南子道應訓惠子

爲惠王爲國法

梁惠王  
惠施

王以示翟煎曰善可行

乎煎曰不可今夫舉大木者前呼邪許後亦應

之此舉重勸力之歌也豈無鄭衛激楚之音哉  
然不用者不若此其宜也治國有禮不在文辨  
邪余遮反○去起呂反○毛氏以筐曰醜以藪  
曰潛疏筐竹器也藪草也漉酒者或用筐或用  
草用草者用茅也左傳包茅縮酒藪素口反漉  
音鹿○語錄古人縮酒用茅非謂祭時以縮酌  
求神也禮記特牲篇縮酌用茅注謂沛之以茅  
縮去滓也此詩下章注云潛茜之也釋文謂以  
茅沛之去其糟也如今人或以器或以布帛去



酒滓然想古人不肯用布帛故用茅泚子禮反  
昔與縮同○爾雅注俗呼五月羔爲羜○殺所  
界反樂音洛下章同○三章饌說文乾食徐鍇  
今人謂乾飯爲饌

天保

小六下報上

經○本義此詩文意重復以見愛其上深至如此  
詩人爾其君者蓋稱天以爲言○語錄皆人臣  
頌祝其君之言然辭繁而不殺者以其愛君之  
心無已也○一章詩記除有消去之義所稟之

薄者雖小福不能容載惟其甚厚故福祉之來不問多寡其受之也皆若消去而未嘗有者所謂何福不除也○卒章家說月弦日升言其始盛南山之壽言其久盛也

前三章言受福于天後三章言受福于祖單厚多益戩穀乃受福于天之實吉蠲孝饗爲受福于祖之實蓋天將降六任於是人必使其氣質清明好善全德而爲受福之基故單厚多益戩穀皆言俾爾旣有此德則福之至

有不期然而然者庶則言歸之者眾也第三  
第六兩章皆言得福之厚無窮蓋兩結受福  
于天與祖之意各有所指也君子誠以格天  
孝以事祖故有此效人而能盡誠孝之道則  
其德莫可尙矣人臣祝其君容有大於此者  
乎

傳○三章長知丈反卒章同○四章諏遵須將侯  
二反謀也○周禮大宗伯以祠春享先王以禴  
夏享先王以嘗秋享先王以烝冬享先王詩疏

若以四時當云祠禴嘗烝詩以便文故不依先

後自殷以上則禴禘嘗烝至周公則去夏禘之

名以春禴當之更名春日祠○前編曰路史以

稷生齋蠶齋蠶生叔均史記謂不啻卒子鞠立

鞠卒子公劉立而路史又謂公劉之去后稷已

十餘世矣世本云公劉慶節皇僕差弗偽榆史記

作毀公非辟方史記缺辟方皇甫氏謂高圉侯

牟史記缺侯牟皇甫氏謂高圉字者非亞圉雲都史記缺雲都皇

者非漢書表太公組紺史記作公叔祖類世表

云亞圉弟



一名諸蓋史記缺路史號太公追王子金子案世本

自不宙鞠公劉至季歷已十七世史記拘於十

五王文始平之之數遂謂后稷之子為不宙曾

孫為公劉前既缺代又自公非已後缺四世不

書皇甫氏不得其說遂以四世為字而組紺又

自有四名獨索隱覺其非而不明辨路史已明

辨而不斷十五王之說今案國語十五王蓋自

公劉數至文王爾音切見周南一

傳言公叔祖類據史記而言之也然則自叔

均以下不窻以上不知其名所祭者不知幾  
代今皆不可考矣

嘏舉下反祝爲尸致告於主人之辭○五章遣  
唯季反黔其淹反黑色○六章恆釋文古鄧反  
韻同無古登反恐此當作協○語錄承是繼承  
自相接續之意松柏非是葉不彫但舊葉落時  
新葉已生

采薇小七遣戍役

經○語錄首章略言征夫之出蓋以獫狁不可不

征故舍其室家而不遑寧處至二章則既出而  
不能不念其家三章則竭力致死而無還心蓋  
不復念其家矣至四章五章則惟勉於王事而  
欲成其戰伐之功也卒章則其事成之後極陳  
其勞苦憂傷之情而念之也○三章疚居又反  
采薇以下三詩雖曰遣戍勞還而專主於獫  
狁蓋非汎言也抑當是之時有獫狁連西戎  
爲中國之患命將出師或周公作此詩而遣  
勞之故能深知其情而極道之而且勸之以

義如此後凡出師則皆以此歌之也

傳○一章薇見召南草蟲○獾狢北狄也史記唐

虞以上有山戎獾狢葷粥戰國後為匈奴注堯

曰葷粥周曰獾狢葷許云反粥余六反獾與獾

同

古者席地跪與坐無大異大率皆雙膝著地

直其身則為跪安其身則為坐啓居即跪坐

也

舍始野反風福鳳反愾口漑反怒也左氏傳敵



王所愾復扶又反中音仲○三章剛謂薇老而  
堅也

十月爲陽爾雅文也時坤用事嫌於無陽故  
以名此月爲陽者鄭氏說也扶陽抑陰固聖  
人之意陰旣極矣而名其月爲陽果能扶陽  
乎不然則是以虛言而欲奪造化之實以誑  
世也必不然矣夫陰陽消息自微而著皆有  
其漸一陽之生至子半而成其肇基乃在亥  
半則小雪之時正六陽之極陽絕於上而回

於下之幾也。因是而名十月爲陽正。闡幽之意。則其義豈不著明矣乎。

四章將帥並去聲。五章同。○五章語錄問小人所腓。傳腓猶芘也。又引程子曰。腓隨動也。如足之腓。足動則隨而動也。案易咸傳。腓足肚行則先動。足又舉之。非如腓之自動。本義亦曰。欲行則先自動。由程子前說觀之。則腓爲隨。足以動之物。由後二說觀之。則腓爲先。足而動。明矣。不當引之以解此詩之義。不若猶芘之云。得之生。

民牛羊腓字之傳亦以腓爲芘若施於此語與  
上文君子所依意義亦相類也答曰此非大義  
所繫今詳兩說誠不合當刪去然版本已定只  
於補脫中說破可也又百卉具腓又有他訓不  
知此字竟是何義也○戴侗六書故腓脰後肉  
腓腸也小人所腓言小人卒徒隨車如腓也行  
音杭朔師交反弓末也○疏魚獸皮爲弓韃矢  
服海水潮及天將雨其毛皆起水潮還及天晴  
則毛復如故韃居言反弓衣也○難去聲○六

章爾雅注疏蒲柳生澤中可以為箭左傳董澤之蒲

出車正小八勞還率

經○二章子金子僕夫況瘁謂我憂心已自悄悄

僕夫況又勞悴○四章黍稷見王黍離○子金

子載訓初亦可夏小正寒日滌凍塗○五章上

六句與召南草蟲同○卒章繫見召南采芣

一章受命而出二章臨事戒懼三章奮揚威

武皆主於出而言也四章敘其歸期五章室



家之望六章振旅凱旋皆主於歸而言也

傳○一章爾雅邑外謂之郊郊外謂之牧注疏邑

國都也界各十里而異其名○勞郎到反還音

旋率與帥同語去聲難乃且反○二章龜蛇曰

旄鳥隼曰旟及下交龍爲旂皆周禮司常文注

龜蛇象其扞難避害鳥隼象其勇捷交龍一象

其升朝一象其下復疏龜有甲能扞難蛇見人

避之是避害鷹隼能擊故云勇鳥飛疾故云捷

又大司馬諸侯載旂郊野載旒百官載旟今案

傳意以曲禮師行之法爲解則不用周禮意也  
○旃又見鄘干旄○茲箋或作滋意同滋益也  
○幟昌志式志二反○子金子出師以喪禮處  
之士泣涕蓋必死也惟必死是以能勝○四章  
語錄問簡書二說曰後說爲長當以後說在前  
前說只據左氏簡書同惡相恤之謂然此是天  
子戒命不得謂之鄰國○五章將帥並去聲○  
與平聲○采薇箋昆夷西戎也疏西方曰戎夷  
是總名○卒章倉庚見周南葛覃

杖杜九九勞還役

經○詩緝此詩四章皆不言戍役來歸之事唯述

其未歸之時室家思望之切如此則今日之歸

其喜樂為何如也所以慰勞之○一章杖杜見

唐杖杜○三章杞詩緝枸櫞也見四牡

一章言冬未歸二章言至春將莫亦未歸三

章言春已莫而未歸四章言所期俱過而將

歸也

傳○一章勞去聲還音旋○三章罷音皮○四章

灼龜曰卜揲著曰筮揲實葉反著升脂反○繇直又反著龜之辭也○題下將帥勞並去聲

南陔正小十笙詩 異

右鹿鳴之什

白華正小十一笙詩 異

華黍正小十二笙詩 異

魚麗正小十三燕饗通用 異

經○二章魴見周南汝墳○三章鯉見陳衡門

傳○一章埤雅鱸今黃揚魚性浮而善飛躍故一



曰揚鯨性沈大如指狹圓而長有黑點文常沙  
中行亦於沙中乳子又曰吹沙長三寸許背上  
有刺螫人螫音適○解下賣反鮓徒何反○二  
章詩緝毛氏以鱧爲鮓本草云蠡一名鮓今黑  
鯉魚道家以爲厭者也郭璞云鱧鮓山陰陸氏  
云鱧今立鯉與蛇通氣是郭璞陸氏皆同毛說  
以鱧爲今之烏鯉魚也今不從舍人云鱧名鮓  
陸璣云鱧鮓也似鯉頰狹而厚是舍人與陸璣  
皆以鱧爲鮓魚也今從之鮓同童二音蠡音禮

鯢戶板反○三章詩緝毛氏及前儒皆以鮎釋  
鯢惟郭璞以鯢鮎各爲一魚鯢今偃額白魚也  
鮎別名鯢本草鯢一名鮎一名鯢是鯢鮎鯢爲  
一魚不言是鯢見郭璞與本草合毛傳質略當  
言似鮎耳鮎乃兼反鯢大計反鯢音啼又延知  
在私二反○五章詩記旨卽所謂嘉也物雖嘉  
旨然陸產不如水產之盛澤物不如山物之蕃  
猶未可以言偕也○六章詩記有卽所謂偕也  
物雖盛多而皆有必適當其時然後盡善所謂

時者不專為用之之時也苟非國家閒暇內外

無故則物雖盛不能全其樂矣○題下閒音諫

由庚

小十四正十四

笙詩

異

南有嘉魚

小十五正十五

燕饗通用

傳○一章釋文罩字有張教竹卓兩音樂字音洛

協句五教反今宜俱讀作入聲不必協韻○左

太冲蜀都賦嘉魚出於丙穴注丙穴在漢中沔

陽縣北有魚穴二所常以三月取之丙地名也

嘉魚鱗似鱒魚埤雅嘉魚鯉質鱒鱗肌肉甚美

食乳泉出於丙穴穴口向丙故也鱗才損反義  
 見豳九罭○筐助角反爾雅疏今楚筐也罩以  
 竹爲之無竹則以荆故謂之楚筐重直容反○  
 二章箋櫟者今之櫟晉爾雅作巢並側交反櫟  
 斲力弔力條二反○四章雛見四牡

崇巨

小十六 正十六

笙詩

異

南山有臺

小十七 正十七

燕饗通用

異

經○上一截初曰邦家之基以其本而言次曰邦  
 家之光則發而有光華矣又次言民之父母則



以其效言也其下則祝其壽而已肩壽固壽矣  
髮白而復黃面黎而浮垢又老之甚者也下一  
截前兩章祝其壽就君子之身而言次兩章曰  
德音不已而茂則以及於人者言之末則又言  
保艾其後又非一時也此詩雖各以兩木起興  
易韻成文而其言亦有敘也

傳○一章夫音符道音導○二章楊見秦車鄰○  
三章陸璣杞一名苟骨山木也其樹如樗理白  
而滑可以爲函及檢板其子爲木蠹可合藥○

四章栲栳見唐山有樞○五章枳諸氏反陸璣

枸木本從南方來其木能令酒薄若以為屋柱

一室之內酒皆少味語錄枸是機枸子建陽謂

之皆拱子甘而解酒毒○著直略反楸音秋

由儀小十八笙詩異

蓼蕭小十九燕諸侯異

經○三章詩記天子之待諸侯甚燕樂而豈弟也

○天生烝民不可以無統故立之君以主之其

始蓋自下而推之也德化足以服乎一方者故

共推以爲一方之主而萬方之主又共推其德  
之至盛足以服乎天下者一人以爲天下之共  
尊而取法焉聖聖相繼於是制爲典禮定其等  
衰上下相維無相偪僭然天子雖爲天下之共  
戴而其用禮乃與其臣非有大相遼絕之勢蓋  
遠則踈而近則親踈則離而親則合故天子之  
禮用十有二而上公之禮用九君臣相去之間  
特三命爾所以三公坐而論道更相可否堯庭  
之都俞吁咈虞庭之賡歌君臣之間雍雍和樂

而敬愛之心未嘗不存乎其中三代聖君蓋莫不由是道也觀宴樂羣臣之諸詩可見矣至於蓼蕭之詩尤見卑孫樂易直猶賓主相敵慶幸之辭安有一毫自尊陵下之意其曰見君子而我心寫燕笑語是以有譽處固備其謙接之語至曰爲龍爲光則又其卑孫之極者也上之人禮容揖孫乃如此而爲下者所以承順悅服又當如何邪豈弟之氣象盈於朝廷被於天下其化安得不至於比屋可封哉自秦始皇尙氣勢



而不知德義又自尊而卑人務使君臣之禮懸絕如天地然後上下之情離而亂臣賊子奸名犯分者愈眾矣衰初危反偪彼卽反孫易並去聲○此詩後三章下兩句皆言諸侯唯首章下句言已

傳○一章詩緝毛云蕭蒿也釋草蕭萩郭璞云卽蒿也陸璣蕭今人所謂萩蒿或謂之牛尾蒿似白蒿莖麤科生有香氣故祭祀以脂藝之爲香者也○朝音潮○二章蕃音煩○三章易以豉

反○左氏傳宣二年初驪姬之亂詛無畜羣公  
子事在僖四年驪呂支反詛莊助反○春秋昭  
元年秦伯之弟鍼出奔晉左氏傳秦后子有寵  
於桓如二君於景其母曰弗去懼選鍼適晉其  
車千乘司馬侯問焉曰子之車盡於此而已乎  
對曰此之謂多矣若能少此吾何以得見趙孟  
曰吾子其曷歸對曰鍼懼選於寡君是以在此  
鍼其廉反蓋鍼桓公之子景公之弟也桓公愛  
之是以富至千乘史記謂富而或譖之恐誅乃

奔選數也恐數其罪而加戮也○四章冲釋文

直弓反一音敕弓反○鏹悲驕反義見衛碩人

湛露小二十燕諸侯

經○三章杞見南山有臺棘見邶凱風○四章桐

椅見鄘定之方中

此詩皆無義興一章以匪不二字興下不無

二字二章兩在字相應三章則承上在彼二

字卒章則如歐陽公謂詩人比事多於卒章

別引他物是也下兩句皆以莫不承之其末

章之興尤爲無義者也

傳○一章乾音干○疏夜飲者君留而盡私恩之  
義故言私燕也○儀禮燕禮曰宵則庶子執燭  
於阼階上司宮執燭於西階上甸人執大燭於  
庭閽人爲大燭於門外注宵夜也庶子世子之  
官也燭樵也甸人掌共薪蒸者庭大燭爲位廣  
也閽人門人也爲作也作大燭以候賓客出疏  
凡燕法設燭者或射之後終燕則至宵或冬日  
則不射亦宵也樵者古者無麻燭而用荆樵未



熬曰焦但在地曰燎執之曰燭樹於門外曰大  
燭於門內曰庭燎甸大練反闡音昏燹哉約哉  
妙二反共音恭○卒章喪息浪反○題下見彤  
弓題下

右白華之什

彤弓

小二十一  
正二十一錫有功諸侯

傳○一章弛式氏反飲於鳩反府藏之藏徂浪反  
分扶問反○疏饗者烹太牢以飲賓是禮之大  
者故曰大飲賓曰饗謂以大禮飲賓獻如命數

殺牲俎豆盛於食燕周語曰王饗有體薦燕有  
折俎公當饗卿當燕是其禮盛也○漢哀帝建  
平四年上發武庫兵送侍中董賢及乳母王阿  
舍執金吾母將隆奏武庫兵器天下公用今便  
僻弄臣私恩微妾而以天下公用給其私門非  
所以示四方也母將之母音無○易屯九五屯  
其膏注疏膏謂膏澤恩惠之類屯難其膏不能  
博施○韓信言項羽之爲人也見人慈愛言語  
嘔嘔至人有功當封爵者印刻敝忍不能予此

婦人之仁也嘔凶于反悅言也刑戶官反訛缺也予上聲○二章疏右謂設饗禮以勸其功此勸既非勸酒故卒章疇亦不得爲疇酒詩記尊而右之詩緝右與宥侑通皆助也左傳云王饗醴命之宥注以幣物助勸是饗禮必有賜以爲宥而彤弓則宥之大者也○三章說悅同○疏案燕禮賓既受獻西階上坐卒爵賓以虛爵降賓坐取觚卒盥揖升酌以酢主人於西階上主人拜受遂卒爵是主人獻賓賓酢主人也又曰

主人盥洗升媵觚於賓酌散西階上坐奠爵拜  
賓賓降筵答拜主人坐祭遂飲主人酌膳賓西  
階上拜受爵于筵前反位主人拜送爵賓升席  
坐祭酒遂奠于薦東是主人又飲而酌賓曰醕  
也媵以證反送也或讀作揚提舉也散悉旦反  
傳於右曰勸也尊也於醕曰厚也勸也是皆  
取義於弓而不取義於饗也蓋此詩專主於  
錫弓言錫弓則饗意自見未有不饗而錫者  
也是醕字借醕酒之義以爲厚勸之喻觀傳



有猶字可見矣

題下左氏傳文四年衛甯武子聘魯公與之宴  
爲賦湛露及彤弓不辭又不答賦使行人私焉  
對曰昔諸侯朝正於王王宴樂之於是賦湛露  
則天子當陽諸侯用命也諸侯敵王所愾而獻  
其功王於是賜之彤弓一彤矢百旅弓矢千以  
覺報宴今陪臣來繼舊好君辱貺之其敢干大  
禮以自取戾武子甯俞也朝正謂朝而受政教  
也愾苦愛反旅音盧黑也好呼報反○爲于僞

反○詩緝書文侯之命彤弓一彤矢百左傳晉  
文公敗楚於城濮獻功於王王饗醴命晉侯宥  
賜彤弓一彤矢百陳氏曰春秋所載皆謂諸侯  
有功則王賜之彤弓以旌伐功而已未嘗謂既  
賜然後得專征也王制言賜弓矢然後征蓋言  
天子命諸侯征伐故賜弓矢以將王靈耳安得  
有專征之言乎鄭氏遽謂得專征伐由漢而下  
有無君之心者徵求弓矢之賜脅諸侯而肆其  
姦者紛然蓋康成啓之也漢音卜徵音驕○周

禮大司馬以九伐之法正邦國馮弱犯寡則眚  
之賊賢害民則伐之暴內陵外則壇之野荒民  
散則削之負固不服則侵之賊殺其親則正之  
放弑其君則殘之犯令陵政則杜之外內亂烏  
獸行則滅之注及釋文馮皮冰反猶乘陵也言  
不字小而侵侮之眚所景反猶人青瘦謂四面  
削其地伐者兵入其竟鳴鐘鼓以聲其罪壇與  
壇同音善謂置之空壇以出其君更立其次賢  
者負恃險固不服事大則侵之兵加其竟而已

正之者執而治其罪殘殺也犯令者違命也陵  
 政者輕政法不循也杜之者杜塞使不與鄰國  
 交通滅謂誅去之○晉穆帝永和七年荊州刺  
 史桓温屢求北伐詔書不聽温拜表輒行安帝  
 隆安三年孫恩陷會稽等郡劉牢之鎮京口發  
 兵討恩拜表輒行

菁菁者莪

小二十二  
正二十二

燕賓客 異

經○二章沚見召南采芣○三章陵見吉日

傳○一章疏莪蒿一名蘿蒿生澤田漸洳之處葉



似邪蒿而細科生三月中莖可生食又可蒸香  
美味頗似薑蒿漸子廉反洳如豫反○三章疏  
言古者貨貝謂古者寶此貝爲貨也漢食貨志  
以大貝牡貝幺貝小貝不成貝爲五也大貝四  
寸八分以上直錢二百一十文牡貝三寸六分  
以上直錢五十文幺貝二寸四分以上直錢三  
十文小貝一寸二分以上直錢一十文以上四  
種各二貝爲朋不成貝寸二分不得爲朋率枚  
直錢三文也鄭氏因經廣解之言有五種之貝

其中以相與為朋非總五貝為一朋也志所言  
王莽時事莽多舉古事而行五貝故知古者貨  
貝焉

愚案一章曰興也而又著或曰比下章倣此  
於下三章則皆曰比蓋互見也意四章皆可  
作興亦皆可作比也前三章言莪而卒章言  
舟則與湛露同

六月

小二十三  
變一

宣王時詩人敘尹吉甫伐玁狁有功

釋文從六月至無羊十四篇是宣王之變小雅

朱子不盡從其說

經○末章祉音恥○詩緝釋文云合毛炙物曰魚  
鼈可煮不可炰今云魚鼈謂火蒸煮熟之也

此詩蓋從征之君子所作詳味其辭若親履  
其事者一章總言盛夏出軍之由二章言車  
服備而軍出三章言攻伐之事四章言獫狁  
侵地以啓下章驅逐之所至末章言軍凱旋  
也詩前五章皆言車馬之盛但前四章汎言  
軍中之車馬五章乃言吉甫之車馬一章我

我朝廷也二章我我軍眾也卒章我我吉甫也一章之服軍帥之服也二章之服軍眾之服也

傳○一章疏言載之者以戎服當戰陣之時乃服之在道未服之○周禮春官司服凡兵事韋弁服注韋弁以韎韋爲弁謂淺赤色韋也韎音妹又莫拜反○弁制見衛淇奧○成康昭穆共懿孝夷八王而至厲王厲王好利榮夷公爲卿士用事王暴虐侈傲使巫監謗者告則殺之三十



七年國人叛而襲王王出奔彘太子靜匿召公  
家周召二相行政號曰共和十四年王崩  
于彘二相立太子靜是爲宣王○二章詩記漢  
文帝詔吉行五十里師行三十里前漢律歷志  
武王伐紂初發以十月戊子而戊午渡孟津孟  
津去周九百里師行三十里故三十一日而渡  
○皆中之中陟仲反應去聲○愾苦愛反義見  
彤弓題下○三章詩緝說文曰顛大頭也脩以  
言其身之長廣以言其腹背之充顛以言其首

之大三者相稱所以成其大也○將帥皆去聲  
○四章度徒洛反○詩記整居言無憚也○爾  
雅十藪周有焦護注扶風池陽縣瓠中是也今  
案池陽卽三原也但郭注以焦護爲一所傳旣  
引之而又云焦未詳所在此意未詳○疏鎬王  
肅以爲鎬京故王基駁曰下章云來歸自鎬我  
行永久言吉甫自鎬來歸猶春秋公至自晉至  
自楚也前漢劉向疏吉甫之歸周厚賜之其詩  
曰來歸自鎬我行永久千里之鎬猶以爲遠顏

師古曰鎬非豐鎬之鎬○涇見邽谷風傳幟旗也毛氏烏章錯革烏爲章疏錯置也革急也畫是急疾之烏於繆也詩緝白旆白帛也以絳帛爲旆以帛續旆末爲燕尾戰則旆之疏白旆謂絳帛九旗之物皆用絳此旃而言旆者散則通名錯七故反革音急繆音衫詳見鄘干旄○詩記軍前曰啓後曰殿元戎十乘以先啓軍行之前者所謂選鋒也兵法兵無選鋒曰北史記三王世家注詩元戎十乘以先啓行韓嬰章句曰

元戎大戎謂兵車也車有大戎十乘謂車纒輪  
 馬被甲衡扼之上畫有劍戟名曰陷軍之車所  
 以冒突先啓敵家之行伍也家說行當音杭韻  
 協纒莫干反被去聲○五章詩緝有文有武之  
 吉甫乃萬邦以之爲法辨一獫狁餘事耳

采芑

小二十四  
變二

宣王時詩人敘方叔征南蠻有功

經○詩緝南征北伐二詩皆班師時作六月之詞  
 迫采芑之詞緩六月似討而定采芑似畏而服  
 ○一章李氏毛以薄言采芑爲菜豐水有芑爲



草維糜維芑爲穀王氏皆以爲穀詩緝新田菑  
畝中鄉不應指菜○騏見秦小戎○二章詩緝  
芑與佩皆非軍中之服路以金路則非戎路馬  
有和鸞則非戎馬蓋方叔克壯其猶如吳起將  
戰不帶劍武侯臨陣不親戎服羊祜輕裘緩帶  
杜預身不跨馬故詩人詠其車服之美而已○  
三章馱疾飛貌○四章詩緝少年輕俊之人勇  
力求勝未能深謀遠慮唯方叔老成故能尙謀  
不尙戰以謀爲壯不以力爲壯也六月之詩事

勢急迫采芑之詩辭氣雍容以北伐則四夷交  
 侵初用兵也南征則北方已服中國粗定方叔  
 乘北伐之威以臨蠻荆也下篇車攻則中興之  
 功成矣粗徂古反

傳○一章肥可生食疏作脆可生食詩緝同當以  
 脆為正○蕡音買將子匠反乘食證反背音佩  
 ○爾雅田一歲曰菑二歲曰新田三歲曰畚疏  
 菑災也始災殺其草木江東呼初耕地反草為  
 菑新田新成柔田也畚和柔之意田舒緩也詩

疏臣工傳及易注皆與此同唯坊記注云二歲  
曰畚三歲曰新田當是轉寫誤韻會田一歲曰  
菑始反草也二歲曰畚漸和柔也三歲曰新田  
已成田而尙新也四歲則曰田矣若二歲曰新  
田三歲則爲田矣何名爲畚鄭注坊記之說爲  
是但於采芑臣工不暇辨耳爾雅旣從毛注之  
失孔疏又言鄭注轉寫之誤皆非也○古者馳  
車一乘則革車一乘馳車戰車革車輜車載器  
械財貨衣裝者也馳車用四馬革車用十二牛

司馬法一車甲士三人步卒七十二人炊家子  
十人固守衣裝五人廐養五人樵汲五人馳車  
七十五人革車二十五人○詩緝路車金路也  
以有頡言赤又巾車鈎樊纓今有鈎有膺知其  
爲金路疏春官巾車注鈎婁領之鈎也以金爲  
之是鈎用金在領之飾也膺樊纓也在膺之飾  
惟有樊纓樊與鞶同謂今馬大帶纓今馬鞅金  
路其樊及纓以五采蜀飾之而九成蜀者織毛  
爲之若今之毛氍毹以衣馬之帶鞅也巾車云



金路鉤樊纓九就同姓以封或方叔爲同姓也  
方叔元老五官之長是上公也上公雖非同姓  
或亦得乘金路矣樊音盤領戶感反蜀音計毳  
極俱反餽山于反○二章治去聲○毛氏錯衡  
文衡也疏錯雜也雜物在衡是有文飾○鑣見  
衛碩人○朱芾見曹侯人及後斯干○疏三命  
至九命皆蔥珩非謂方叔唯三命也○三章爾  
雅鷹隼醜其飛也翬注疏謂隼鷁之屬鼓翅翬  
翬然疾飛是急疾之鳥也齊謂之擊征或曰題

肩或曰雀鷹春化爲布穀者是埤雅鷹之搏噬不能無失獨隼爲有準每發必中或曰卽今呼爲鶻者○疏周禮有錡鏡無鉦說文云鉦鏡也似鈴柄中上下通然則鉦卽鏡也說文又云錡鉦也鏡也則錡鏡相類俱得以鉦名之故鼓人注云錡鉦也形如小鐘是錡亦名鉦也錡似小鐘鏡似鈴是有大小之異耳但錡以節鼓非靜之義故知鉦以靜之指謂鏡也錡音濁鏡奴交反○疏出曰治兵人曰振旅莊八年公羊文也

公羊本曰祠兵周禮左傳穀梁爾雅皆作治兵

明彼爲誤故箋改其文而引之○四章與音預

車攻

小二十五  
變三

宣王會諸侯東都因田獵選車徒

傳○一章詩記案字書訓釋說文並以龐爲高屋

蓋馬之高大也○復會之復扶又反○二章李

氏曰毛氏甫大也田者大艾草以爲防鄭氏謂

鄭有甫田甫草甫田之草案左氏曰鄭有原圃

則圃者鄭圃之名今鄭氏以圃爲甫田固非其

字又以甫草爲甫田之草其說爲迂當從毛氏

○三章數色主反○詩記敖山名晉師救鄭在  
敖鄙之閒士季設七覆于敖前則敖山之下平  
曠可以屯兵翳薈可以設伏所謂東有甫草卽  
此地也括地志滎陽故城在鄭州滎澤縣西南  
十七里殷時敖地周時名北制在敖山之陽鄙  
苦交反覆扶又反○四章詩記諸侯人君宜朱  
芾而此赤芾者會同故也治其臣庶則朱芾君  
道也故方叔服其命服則朱芾會同於王則赤  
芾臣道也故其會同有繹則赤芾也○疏天官



屨人注云鳥有三等赤鳥爲上冕服之鳥下有  
白鳥黑鳥此云金鳥者卽禮之赤鳥也故箋云  
金鳥黃朱色加金爲飾○疏大宗伯注時見者  
無常期諸侯有不服者王將有征討之事則既  
朝覲王爲壇於國外合諸侯而命事焉殷眾也  
十二歲王如不巡狩則六服盡朝禮畢王爲壇  
合諸侯以命政焉如是則會同禮別不得並行  
蓋會者交會同者同聚理旣是一故論語及此  
連言之○見音現屬之玉反○五章柴釋文又

音才寄反○著知略反○七章漢書景帝三年  
太尉周亞夫引兵擊吳楚深壁而守夜軍中驚  
內相攻擊擾亂至帳下亞夫堅卧不起頃之復  
定○踐子淺反膘頻小反射食亦反下如字腸  
音愚又五偶反乾音干髀補爾步未二反鬪胡  
了反字書無此字中竹仲反案傳文與毛傳顛  
倒今依文取疏及釋文解之面傷爲當面射之  
踐毛謂在傍而逆射之二者皆爲逆射不獻者  
嫌誅降之義不成禽不獻者惡其害幼少膘者

脅後髀前肉也。膊肩前也。自左臑射之，達過於右肩，膊爲上殺，以其貫心死，疾肉最潔美，故以爲乾豆。謂乾之足以爲豆，實供宗廟也。達右耳，本蒙上文言自左射之，達右耳，本而死者爲次殺，以其遠心死，稍遲肉已微惡，故以爲賓客也。髀謂股外髀水，臑也。射左股髀而達過於右脅，髀爲下殺，以其中脅死最遲肉又益惡，充君之庖也。凡射獸皆逐後從左廂而射之，每禽取三十，而宗廟賓客君庖各十也。臑，口箆反，腰肉。

吉日小二十六宣王田獵

變四

經○語錄問車攻吉日詩朱子曰好田獵之事古

人亦多刺之然宣王之田乃是因此見得其車

馬之盛紀律之嚴所以爲中興之勢者在此其

所謂田異乎尋常之田矣○二章差初佳反

傳○一章晉天文志房四星亦曰天駟爲天馬主

車駕南星曰左驂次左服次右服次右驂亦曰

天廐爾雅注龍爲天馬故房謂之天駟詩疏校

人春祭馬祖夏祭先牧秋祭馬社冬祭馬步旣



四時各有祭馬祖常祭在春而將用馬力則又用彼禮以禱之通典隋制仲春用少牢祭馬祖於大澤積柴於燎壇禮畢就燎以剛日愚案此雖隋禮其初必有所考想三代之禮大略如此○二章禹貢謂東過漆沮孔氏曰漆沮二水名亦曰洛水出馮翊北寰宇記漆水自耀州同官縣東北界來經華原縣合沮水沮水漢志出北地郡直路縣東卽今坊州昇平縣北子午嶺俗號子午水下合榆谷慈馬等州遂爲沮水至耀

州華原縣合漆水至同州朝邑縣東南入渭洛

水出慶州廢洛源縣北白於山經上郡雕陰縣

秦望山南過襄樂郡又東南過同州衙縣以入

于渭衙縣即白水縣也程大昌泰之雍錄禹貢

止有漆沮秦漢以後始有洛水所謂洛水者地

志出北地郡歸德縣北蠻夷中即洛源縣其水自入

塞後逕廊坊同之三州始入渭孔安國輩謂自

馮翊襄德縣入渭者也漢襄德唐同州衙縣亦

朝邑縣也所謂沮水者長安志自邠州東北來

至華原縣南流合漆水入耀州富平縣石川河  
石川河者沮水正派也所謂漆水者長安志漆  
水自華原縣東北同官縣界東南流入富平縣  
石川河是爲合漆之地此三水分合之詳也若  
槩三水而命其方則漆在沮東至華原乃合沮  
沮在漆西旣已受漆則遂南東而合乎洛洛又  
在漆沮之東至同州白水縣與漆沮合而相與  
南流以入于渭三水雖分三名至白水縣則遂  
混爲一流故自孔安國班固以後論著此水者

皆指襄德入渭之水爲洛而曰洛卽漆沮者言其本同也禹貢導渭序漆沮在豐涇之下豐之入渭在盩厔縣境蓋在咸陽西南涇之入渭在陽陵則在咸陽之東漆沮入渭在襄德又在陽陵東北三四百里也地理攷異書漆沮在豐涇之東爲渭之下流吉日漆沮乃會於東都維田獵之後則宜爲下流之漆沮於東都爲地近非緜之漆沮也餘見大雅緜馮皮陵反華胡化反雍於用反鄜方無反襄卽懷字邠卽豳字盩張



流反屋陟栗反○三章趨疾走也○共音恭○

四章挾釋文子洽子協戶頰三反兕又見周南  
卷耳傳○中陟仲反疏小者射中必死苦於不  
能射中大者射則易中唯不能卽死小豨云發  
言發則中之大兕云殪言射著卽死異其文者  
言中微而制大○周禮酒正五齊一曰汎齊二  
曰醴齊三曰盎齊四曰緹齊五曰沈齊注疏醴  
猶體也此齊熟時上下一體汁滓相將故名醴  
齊造用秣稻麴蘖詩緝少麴多米二宿而熟饗

為盛禮王饗諸侯則設醴示不忘古禮之意也

齊才細反緹音體稊音述葉魚列反

鴻雁小二十七變五

流民喜宣王勞來安集

以下時

世多不可考

傳○一章勞來上力報反下力代反還音璿○二

章毛氏一丈為板五板為堵疏累五板也板廣

二尺故周禮說一堵之牆長丈高一丈李氏案

公羊傳五板而堵何休謂堵凡四十尺許慎五

經異義戴禮及韓詩說八尺為板五板為堵板

廣二尺積五板高一丈愚案疏說則堵方一丈  
李氏說則堵長四丈而高一丈二說不同○三  
章聞音閑傳有六知字一二四音智三五六如  
字

庭燎

小二十八  
變六

王早起視朝

經○燎力召反

此固王者勤於視朝之詩而左右之臣設言  
以述王之意也王問曰夜如何其則對曰夜  
未央王則意其庭燎已光君子其至而鸞聲

將將矣頃之又問夜如何其則對曰夜未艾  
蓋夜亦將盡矣王則意其庭燎既久而光漸  
微君子至之近而鸞聲噦噦矣既久又問夜  
如何其則對曰夜鄉晨王則意其天明而見  
庭燎之煙火相雜君子皆至而可以辨其旂  
之色矣於是出而視朝可見卧不安席中夜  
以思惟恐時之後也或曰非問答之辭左右  
之臣直述其事也其自言曰夜如何其夜猶  
未央也而庭燎已光矣君子已有至者而鸞



聲將將矣既而又言夜如何其夜猶未艾也  
庭燎則然之久而明少矣君子至之多而鸞  
聲噦噦矣久而又言曰夜如何其夜則鄉晨  
矣天漸明而見庭燎之煙矣君子皆至而可  
見其旂之色矣於是王出而視朝也蓋王勤  
於政事及時視朝而號令嚴肅執事者恪恭  
陳列以時百官之人朝者亦皆先時而至而  
車服威儀莫不和整以俟聽朝終篇未嘗言  
王之勤而勤勞之意自見於言外二者必有

一得詩意也

傳○一章周禮司烜氏凡邦之大事共墳燭庭燎

注墳大也樹於門外曰大燭於門內曰庭燎皆

所以照眾爲明疏庭燎與大燭一也在庭中故

曰庭燎郊特牲曰庭燎之百由齊桓公始也庭

燎之差公蓋五十侯伯子男皆三十其百者天

子禮庭燎所作以葦爲中心以布纏之餽蜜灌

之若今蠟燭詩疏古制未得而聞要以物百枚

并而纏束之今則用松葦竹灌以脂膏也又見

湛露烜音毀共音恭○并卑政反○鸞鑣見秦

駟鐵傳○三章輝釋文音暉

沔水

小二十九變七

憂亂

經○一章駟見采芑

末章飛隼而循中陵民言訛偽者何乃莫之  
懲止邪於是謂其友曰當敬以自持否則讒  
言其興而見及矣憂而戒之之辭也讒言固  
可憂惟敬足以勝之詩人之學知所本矣

傳○一章見音現疏朝朝也欲其來之早宗尊也

欲其尊王臣之朝君猶水之趨海故以水流大

海為朝宗朝也之朝張遙反

鶴鳴小三十不知所由必陳善納誨之詞 異

傳○一章疏鶴形大如鵝高三尺喙長四寸餘多

純白或有蒼色者今人謂之赤頰常夜半鳴高

亮聞八九里雌者聲差下○數上聲○稗見幽

七月○二章疏穀幽州謂之穀桑荆揚謂之穀

中州謂之楮殷中宗時桑穀共生是也江南人

績其皮以為布又擣為紙其葉初生可為茹○



邵子論玉石又一意也略與前說不同○橫戶  
孟反

右彤弓之什

祈父

小三十一  
變九

軍士怨久役

序以爲刺宣王未

見必然

傳○一章疏古者祈圻畿同字得通用○賁音奔

○周禮司右上士二人下士四人胥八人徒八

十人凡國勇力之士能用五兵者屬焉虎賁氏

下大夫二人中士十有二人胥八十人虎士八

百人掌先後王而趨以卒伍軍旅會同亦如之  
 舍則守王閑王在國則守王宮詩記禁衛天子  
 之爪牙而使之遠戍是轉予于恤也愚案或曰  
 一說則於爪牙二字為切而得詩意○卒章令  
 音零養去聲○題下數色主反

白駒小三十二賢者去不可留 同上

傳○一章疏苗宜云圃而云場者以場圃同地對  
 則異名散則通○釋文繫足曰絆左氏傳注在  
 宵曰勒絆音半勒音引○漢陳遵以列侯居京

師耆酒每大飲賓客滿堂輒關門取客車轄投井中雖有急終不得去耆讀曰嗜○三章史記田橫故齊王族楚漢間自立為齊王與漢戰敗而入海居島中高帝即位使使召之曰田橫來大者王小者迺侯耳

黃鳥

小三十三變十一

民適異國不得其所

舊以為宣

王詩

經○一章穀字從教從木者木名也從教從禾者百穀之總名亦善也此詩集于穀者木也我肯

穀者善也二字當辨○詩緝興也民適異國不  
得其所無可告語者唯黃鳥可愛平時飛鳴往  
來於此故於其將去呼黃鳥而告之曰爾無集  
于我之穀無啄我之粟矣蓋此邦之人不肯以  
善道待我我亦不久於此將旋歸復反我邦之  
宗族矣與黃鳥告別之辭也○二章詩緝不可  
與明言以橫逆加已不可與之求明白也黃鳥  
本好鳥非可惡者以比不善之俗或不甚切○  
恐詩緝說爲興者是



傳○一章穀見鶴鳴○二章梁三章栩並見唐鴉

羽○黍見王黍離

我行其野

小三十四  
變十二

民依昏姻不見卹

同上

經○一章蔽芾見召南甘棠○畜訓養當音許六

反

傳○一章爾雅又曰婿之父為姻婦之父為婚○

二章陸璣羊蹄似蘆菔而葉長赤鬻為茹滑美

也鬻即煮○蘋徒雷反○三章疏菑一名當河

內謂之菘幽州謂之燕當一名蕘其根正白可

著熱灰中溫噉之可蒸茹以禦飢當音富蕘音續○題下道徒到反行下孟反以為之為如字餘皆去聲賙音周賑贍也

斯干小三十五築室既成燕飲以落之舊說宣

王

經○詩記一章總述其宮室之面勢而願其親睦二章三章述其作室之意與營築之狀至於風雨攸除鳥鼠攸去則宮室成矣故四章言望其外則雄壯軒翥如此五章言觀其內則高明深

廣如此望其外則未入也故曰君子攸躋言其  
方升也觀其內則已入也故曰君子攸寧言其  
既處也六章以下皆頌禱之辭○黃氏先言其  
基址壯厚而不拔兄弟之安居而不爭次則言  
其室家之制度居處之歡悅又次言垣牆之固  
棟宇之麗堂室之美末數章則願其男女之眾  
多子孫之蕃衍而禱頌之意盡矣○李氏宣王  
之營宮室可謂得禮不失之侈亦不失之陋如  
所謂斯翼斯棘斯革斯飛等句不失之陋然將

以除風雨去鳥鼠則不失之侈矣易曰上古穴  
居而野處後世聖人易之以宮室以待風雨然  
則聖人作宮室之意惟欲待風雨而已○一章  
毛氏幽幽深遠也○二章百堵見鴻雁○卒章  
濯力馳反

傳○一章詩記宣王作室後臨水前對山詩緝西  
京賦言長安於前則終南太一於後則據渭踞  
涇祖述斯干也鎬在上林苑中此所謂干謂大  
水之傍必鎬水也舊以干爲澗者非澗是水之



小者○南山見秦終南○檀弓晉獻文子成室  
晉大夫發焉張老曰美哉輪焉美哉奐焉歌於  
斯哭於斯聚國族於斯文子曰武也得歌於斯  
哭於斯聚國族於斯是全要領以從先大夫於  
九京也君子謂之善頌善禱文子趙武也京當  
爲原頌謂張老禱謂文子○二章詩緝美作室  
而言嗣續妣祖者蓋厲王之亂百度廢墜宮室  
亦壞宣王旣已中興王業乃築宮室以復舊觀  
足以見中興之盛故曰嗣續妣祖若竟土未復

以日月星辰占六夢之吉凶日月之行及一曰合辰所在

正夢無所感動二曰噩夢驚愕三曰思夢四曰

寤夢覺時五曰喜夢六曰懼夢季冬聘王夢聘問

也獻吉夢于王乃舍萌于四方以贈惡夢遂令

始難歐疫舍萌猶釋菜萌菜始生也舊歲盡新年至於此時贈送去惡夢噩五

各反舍讀為釋難乃多反歐同驅○禮運宗祝

在廟三公在朝三老在學王前巫而後史卜筮

瞽侑皆在左右王中心無為也以守至正注疏

宗宗伯祝太祝王弔臨則前委於巫動則左史

書之言則右史書之下筮主決疑瞽樂工主和

侑四輔典於規諫者所以慎居處也臨力鴈反

○八章疏典瑞云四圭有邸以祀天兩圭有邸

以祀地圭璧以祀日月璋邸射以祀山川從上

而下遞減其半故知半圭曰璋射食亦反○疏

芾從裳色祭時服纁裳故芾用朱赤但芾所以

明尊卑雖同色而有差降乾鑿度以爲天子之

朝朱芾諸侯之朝赤芾朱深於赤天子純朱明

其深也諸侯黃朱明其淺也舉其大色則皆謂

之朱餘見曹侯人○三人爲纁淺絳也赤與黃  
爲纁

初生之子未能勝衣襁褓而已今不獨衣之  
帶衣又必衣之裳者服之備也所以期其成人  
也故曰服之盛也

九章襍音保疏縛兒被也○婦人所用瓦唯紡  
塼而已語錄瓦紡時所用之物舊見人畫引列  
女傳漆室手執一物如今銀子樣意其爲紡塼  
也然未可必紡如兩足○遺于季反○列女傳



孟子處齊閒居擁楹而歎孟母曰何也對曰今  
道不用願行而母老是以憂也孟母曰夫婦人  
之禮精五飭晷酒漿養舅姑縫衣裳而已矣故  
有閨內之修而無境外之志易曰在中饋無攸  
遂詩曰無非無儀唯酒食是議以言婦人無擅  
制之義有三從之道五飭月令天子春食麥夏  
食菽食稷秋食麻冬食黍周禮疾醫掌養萬民  
之疾而曰以五穀疏謂依月令五方之穀據養  
疾而食也非必入於藥則通於上下皆以是五

穀爲飴也或曰闕澤九章有粟飴糲飴稗飴鑿  
 飴御飴凡五等未詳是否閒何關反夫音扶羃  
 莫狄反養鼻之養去聲闕苦濫反○子金子欲  
 其生男女固祝願之辭而熊羆虺蛇之事又其  
 設辭形容也豈當時之人果以夢熊羆爲得男  
 夢虺蛇爲得女乎○題下圮部鄙反字從土從  
 戊己之己

無羊

小三十六  
變十四

牧事有成牛羊眾多

經○一章來思見白駒傳○二章餼見伐木

首章言牛羊而三章獨言羊者蓋牛服未乘  
車動知人意是牛易於馴者羊負狠好鬪難  
於馴擾今但麾之以肱則畢來既升其馴可  
知也故首章亦言其戢戢而和於牛則惟曰  
溼溼也羊且能馴則牛之馴不言自見矣或  
曰二章乃獨言牛爾故此章唯言羊也

傳○一章釋文呵丑之反食已復出嚼之也江東  
呼爲齧音洩○二章揭音竭擔也○說文蓑草  
雨衣也笠箬無柄也愚謂笠箬卽今傘音登○三

章愚案飛曰雌雄走曰牝牡此曰禽獸者大約  
言之也○兢兢與毛傳同曰堅彊釋文兢其冰  
反當從此音○牢防獸閑也○董主水反策也  
楚荆也皆驅羊之器○四章朱子占夢之說未  
詳豈古者卜筮之家有是說與詩記此牧成而  
考之之詩故以吉祥之事終焉豐年則民閑樂  
故以田以魚夢魚斯豐年之祥也旒者旗者皆  
田官所建旒統人少旗統人多今建旒之處乃  
建旗則民庶眾矣



節南山

小三十七  
變十五

家父刺王用尹氏致亂

釋文從此至何草不黃四十四篇前儒申毛皆  
以為幽王之變小雅

經○詩記案左傳韓宣子來聘季武子賦節之卒

章杜氏謂取式訛爾心以畜萬邦之義然則此

詩在古止名節也○一章南山即終南山見秦

終南○三章詩記京室以大族為氏朝廷以尊

官為氏氏者安危存亡所出也尹氏大族也大

師尊官也故曰尹氏大師維周之氏○四章詩

記式夷式已無小人殆謂尹氏所與圖事者也  
瑣瑣姻亞則無膺仕謂尹氏以親暱而置之高  
位者也○五章詩記鞠誦大戾匪降自天皆尹  
氏爲之也民罹其害無可奈何而歸之於天也  
在民視之則難在王爲之則易進賢而退奸爲  
國之至理而二者之情狀惟平其心者見之王  
如幡然用其至則尹氏必不居位而民之怨息  
矣王如坦然平其心則尹氏自不能逃其罪而  
民之惡怒遠矣夫何難哉愚案傳以此章刺王

及尹氏東萊以此章專刺王愚恐以爲專刺尹氏亦可通而與之前後兩章意貫尤見詩人忠厚之意○七章說文領項也

此詩刺王用尹氏前九章懣極言尹氏之罪而卒章以言歸之王心則輕重本末自見此家父之善於辭也其所以刺尹氏者大要有二事爲政不平而委任小人也一章言尹氏之失民望而致愁蹙二章言爲政不平而不顧天怒民怨三章言大師爲國根本爲政當

均平而其任之重如此四章言任用小人連  
引私黨五章言君子可消天變六章承上言  
尹氏不但不能弭天變抑且生禍亂下四句  
則應前第四章而又起下章欲遁逃之意七  
章言欲遁無所往八章言小人情狀九章言  
尹氏自用拒諫十章歸之於王

傳○一章大音泰父音甫○二章荐與薦同音重  
直用反喪息浪反讟徒谷反謗也○三章語錄  
均本當從金所謂如泥之在釣者釣只是爲瓦



器之車盤也蓋運得愈急則其成器愈快秉國  
之鈞只是此義今集傳訓平者此物亦惟平乃  
能運也○并去聲○四章疏兩堦相謂曰亞者  
一人取姊一人取妹相亞次也取去聲○五章  
夫音扶○六章長上聲爲之之爲去聲○卒章  
適陟革反閒古莧反當去聲

正月

小三十八  
變十六

大夫刺幽王

經

此詩大槩刺小人用事訛僞相挺變亂是非

已不得志而憂世之必亂也一章總言其大略蓋賦而興也正月而霜固天示災異然正陽之時而有窮陰之應此天氣變亂無常因以興起下訛言變亂是非之意終篇未嘗言災變惟首句言之故知因以起興也二章歎己之遭亂三章憂國必爲人所滅四章訛僞之勢甚一時足以勝天五章言如山之高卑易見者訛言尚欲亂之有如指鹿爲馬而上下成俗不知其非六章憂身之無所容七章

言用人不常八章言政事暴惡其勢若火九章言不可無君子之輔十章承上章輔佐而言當謹慎之意十一章言禍亂之極無所逃十二章言小人得志而連其親舊十三章亦言小人得位而良民受禍也○五章有山本卑小者也今則以爲岡陵是訛言也

傳○一章詩記凡講張爲幻以岡上惑眾者皆謂之訛言○詩緝鼠病而憂在于穴內人所不知也○二章喪息浪反卒章同被平祕反○四章

號乎刀反九章同別彼列反五章同○史記吳  
人楚伍子胥鞭平王尸申包胥使人謂之曰子  
之報讎其以甚乎吾聞人眾者勝天天定亦能  
破人○五章占夢見斯干○衛侯慎公頽○六  
章虺見斯干○爾雅蝻蝻蜥蜴蝮蟻守宮注疏  
一物形狀相類而四名在草澤中者名蝻蝻蜥  
蜴在壁名蝮蟻守宮也詩緝蜥蜴上音析下音  
易釋文蜴星歷反字又作蜥是以蜴爲蜥誤矣  
韻會說同今當讀蜴音易蝻音榮蝻音原蝮音



偃蜓徒典反螫音適蟲毒也○七章崎嶇音欻  
軀山陰也境嶠音敲殼瘠薄也○易去聲九章  
同○八章史記幽王娶申后生太子宜臼初宣  
王後宮無夫而生女子懼而棄之童謠曰檠弧  
箕服實亡周國王聞之有夫婦賣是器者王使  
執而戮之逃於道見後宮所棄子收之犇於褒  
褒人有罪入所棄女子於王以贖罪是爲褒姒  
幽王三年見而愛之生子伯服餘見王風檠鳥  
箕反山桑也檠弧以檠爲弧也箕木名服矢房

箕服以箕爲服也○輿地廣記興元府褒城縣  
卽褒國○爲國之爲于僞反○九章難乃旦反  
○十章數所角反○十二章孔叢子論勢篇秦  
攻趙魏大夫以爲於魏便子順曰不然秦勝趙  
必復他求吾恐受其師也先人有言燕雀處屋  
子母相哺煦煦焉相樂也自以爲安矣竈突決  
上棟宇將焚燕雀顏色不變不知禍之將及已  
也可以人而同於燕雀乎子順名斌孔子六世  
孫時相魏安僖王煦呼句反○卒章窶郡羽反

貧也勝音升

十月之交

小三十九  
變十七

大夫刺幽王

箋以此下四篇為厲王之變雅

經○三章史記幽王二年三川竭岐山崩

幽王內有褒姒之邪嬖外有皇父之貪殘牽

引惡類相為表裏褒姒禍之本皇父罪之魁

此詩所以刺也首章言極陰之月陰壯而日

食二章言日食因不用善人婦也臣也小人

也皆陰類也相與蠱王心而敗政事故謫見

于天也三章言又有冬月雷電之異山川之  
變四章言所以致此者皇父引惡黨而褒姒  
爲之內主也五章述皇父采邑民人而言蓋  
皇父爲卿士始固有采邑矣今則改築于向  
遷徙舊邑之民方當種藝之時廢其田廬而  
去六章言皇父選朝臣以爲其國之臣然不  
能選賢惟取貨賄七章民人從役惟恐遭讒  
被虐卒章歎邑人及已之勞而安天命以終  
之○二章于何不臧未知有何災禍之應也



傳○一章奇居宜反復扶又反亢苦浪反去起呂  
反參初簪反差义宜反背音佩○四章予余呂  
反朝音潮

○常武之詩曰王命卿士南仲大祖太師皇父  
是卿士兼太師也太師三公之首而卿士兼  
之則非大宰之屬明矣常武之皇父賢者也  
故詳著其官而又本其祖蓋非十月之皇父  
矣然足以證卿士或說之未然

疏周禮序官趣馬下士箋言申士誤也○六章

箋禮畿內諸侯二卿疏皇父封於畿內而立三  
 有事是增一卿以比列國也○左氏傳注愁且  
 也○強其兩反○七章重平聲說悅同○卒章  
 樂音洛被皮義反

雨無正小四十八變饑饉臣散不去者責去者 異

經○一章駿音俊又音峻

又一章言昊天降災雖曰賦而實如此蓋全章

又皆言王之無德也二章言人心離散三章言

勸○已之忠言不用又戒在位者言上雖不道已

則不可不自敬也四章言羣臣無忠諫者五章言惡直好佞六章言仕之難也七章責去者首章雖曰饑饉而終篇大意皆刺王之不德也然忠厚惻怛之意正已勸人之言前後屢見作詩者蓋摯御之賢者也

傳○一章爾雅注疏凡草菜可食者通名爲蔬可食之菜皆不熟爲饑遽其據反題下同○二章長知丈反悛七全反○四章國語見大雅抑題下○漢百官表侍中加官得入禁中應劭曰入

侍天子故曰侍中百官志掌侍左右贊導眾事  
顧問應對○愬訖黠反無憂貌○五章惡好並  
去聲○卒章疏泣無聲出淚也連言血者以淚  
出於目猶血出於體故以淚比血○爲于僞反

右祈父之什